

**BIBLIOGRAFÍA MICOLÓXICA**  
por  
**M.L.CASTRO\***

Para iniciar este apartado da revista MYKES sobre bibliografía micolóxica co-  
mezamos polas obras de divulgación escritas en galego con distribución aínda  
vixente, ordenadas cronoloxicamente.

***Guía didáctica de fungos e cogumelos de Galicia.* C. Gómez e A. Franco.  
Bahía Edicións (A Coruña). 1992**


Libro con 40 diapositivas e 75 páxinas de texto, no que de forma breve e sinxela se expli-  
can os conceptos imprescindibles para traballar a macromicología cos alumnos. Está distribuído  
en tres grandes capítulos, un relativo a situación dos fungos entre os seres vivos, outro que refire  
a relación do home cos cogumelos e un terceiro que explica as diapositivas. En palabras dos au-  
tores “o nivel dos diferentes recursos non é ho-  
moxéneo, polo que o profesor terá que adaptalo  
ás diferentes capacidades dos alumnos”. Obra  
un pouco antiga xa, pero aínda útil para profe-  
sores, especialmente de ensino primario.



---

\*Laboratorio de Micología. Facultade de Bioloxía. Campus As Lagoas-Marcosende.  
Universidade de Vigo. E-36310-Vigo. e-mail: lcastro@uvigo.es

**Os cogumelos nos ecosistemas forestais galegos. F. J. Fernández de Ana-Magán e A. Rodríguez Fernández. Edicións Xerais de Galicia (Vigo). 2000**



Este libro de 203 páxinas non é unha guía, senón unha obra na que se describe a relación dos fungos cos ecosistemas forestais, baseándose en traballos propios dos autores, realizados no Centro de Investigacións Forestais de Lourizán, Pontevedra (na actualidade denominado SIIAM) durante máis de dúas décadas. Incorpora informacións orixinais sobre temas relacionados ca silvicultura e consta de varios apartados: micoloxía galega, xeneralidades de fungos, manexo, tratamentos forestais, produtividade de cogumelos e ecosistemas galegos, así como dun corto catálogo das mellores especies comestibles.

**Cogumelos de Galicia e Norte de Portugal. M. Castro. Edicións Xerais de Galicia (Vigo). 2004**

Esta guía é unha reedición, corrixida, modificada e ampliada, das anteriores publicadas nesta editorial, ca autoría de L. Freire e M. Castro, dende o ano 1992. A linguaxe é sinxela, pero cientificamente rigorosa, describíense en detalle máis de 400 especies, das que se fotografan 150. Ademais hai unha primeira parte relacionada ca bioloxía, taxonomía e nomenclatura dos fungos e, no fin, preséntanse varios capítulos sobre a relación do home cos cogumelos, incluíndo arredor de 50 receitas de cociña orixinais e 10 de conservación. O glosario e os índices de nomes científicos e populares e os de receitas de cociña, organizados por entradas, primeiros, segundos e sobremesas, completan as 357 páxinas deste libro.

**Guía micolóxica dos ecosistemas galegos. M. Castro, A. Justo, P. Lorenzo e A. Soliño. Baía edicións (A Coruña). 2005**

Esta guía magnificamente ilustrada con acuarelas a cor de Carlos Silvar, describe 556 especies, das que se ilustran 258. Ademais das completas e rigorosas descrições cabe salientar a distribución das especies por ecosistemas: carballeiras, bidueirais, piñeirais, etc., de tal xeito que o visitar un destes hábitats resulta máis doado saber “de visu” cal é a especie que se atopa. Tamén é de resaltar a presenza dunha clave dicotómica que permite identificar, me-

diante caracteres macroscópicos, a totalidade das especies descritas, seguindo as pautas indicadas ao principio da obra, referidas ás xeneralidades dos cogomelos. Na última parte da guía trátase da relación do home e os cogomelos, gastronomía, intoxicacións, etnomicoloxía, ... e algúns apartados tan orixinais e atractivos como importancia na medicina, aplicacións ecolóxicas e industriais, ordenamento forestal e aproveitamento sustentábel. A interesante bibliografía comentada, incluíndo páxinas web, e o glosario e índices de epítetos específicos fai deste libro de 445 páxinas unha guía imprescindible para iniciarse no atractivo mundo da micoloxía.



**Cogomelos de Galicia. J.M.C. Marcote, M. Pose e J.M. Traba. Edita Xunta de Galicia (Santiago de Compostela). 2006 (versión en castelán 2003).**

Este libro de 608 páxinas foi publicado primeiramente en castelán e posteriormente traducido ao galego. Abarca un total de 500 especies, todas elas recollidas e fotografadas polos autores en diversas partes de Galicia, con descrições completas. Comprende un amplo resumo do mundo dos fungos, incluíndo sinxelas claves para a identificación de xéneros. Complétase cunha sección gastronómica na que, despois dos mellores consellos sobre a preparación de conservas e licores, recóllense 210 receitas caseiras, xunto con outras 10 dos máis prestixiosos chefs da comunidade galega, todos con soporte fotográfico.

